

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৯/২০১৭

ঢাকা, শুক্রবার ১৬ জুন ২০১৭, ২ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। সহযোগিতা বাড়াতে ঢাকা ও স্টকহোম একসঙ্গে কাজ করবে :  
সুইডেনে দুই প্রধানমন্ত্রীর দ্বিপাক্ষিক বৈঠক
- ২। সুইডেনের রাজার সঙ্গে প্রধানমন্ত্রী শেখ হাসিনার সাক্ষাৎ
- ৩। সুইডেনের স্টকহোমে বাংলাদেশের প্রধানমন্ত্রীকে লাল গালিচা সংবর্ধনা
- ৪। পাহাড় ধসে প্রাণহানি ও ক্ষয়ক্ষতিতে ত্রাণ, পুনর্বাসন ও সংস্কার  
কার্যক্রম পরিচালনার নির্দেশ প্রধানমন্ত্রীর
- ৫। বাংলাদেশের শ্রমমান ও শ্রম অধিকার নিয়ে আইএলওর বিশেষ অনুচ্ছেদ প্রত্যাহার
- ৬। গম ও ভুট্টার উৎপাদন বাড়াতে ইনস্টিটিউট হচ্ছে : সংসদে বিল উত্থাপন
- ৭। বঙ্গবন্ধুর খুনিদের সম্পত্তি জব্দে ব্যবস্থা নেওয়া হয়েছে : সংসদে স্বরাষ্ট্রমন্ত্রী
- ৮। ঈদে যাতায়াতে পুরাতন গাড়ি নামানো যাবে না : ডিএমপি কমিশনার
- ৯। ঈদকে ঘিরে দেশে নিরাপত্তার কোনো ঝুঁকি নেই : র্যাব মহাপরিচালক
- ১০। রাজধানীতে তিন দিনের জাতীয় ফল প্রদর্শনী আজ শুরু

১। সহযোগিতা বাড়াতে ঢাকা ও স্টকহোম একসঙ্গে কাজ করবে :

সুইডেনে দুই প্রধানমন্ত্রীর দ্বিপাক্ষিক বৈঠক

ঢাকা ও স্টকহোম অর্থনৈতিক সহযোগিতার খাতসমূহে সম্পর্কোন্নয়ন এবং দ্বিপাক্ষীয় সরাসরি বিদেশি বিনিয়োগ (এফডিআই) আরো উৎসাহিত করার ব্যাপারে একসঙ্গে কাজ করতে সম্মত হয়েছে। দুই দেশের নেতৃত্বদ্বন্দ্ব অর্থনৈতিক সহযোগিতা ও বিনিয়োগের লক্ষ্যে দ্বিপাক্ষীয় বাণিজ্য ও বিনিয়োগ বৃদ্ধিতে সদিচ্ছা প্রকাশ করেছেন। গতকাল ১৫ জুন বৃহস্পতিবার প্রধানমন্ত্রী শেখ হাসিনার সঙ্গে সুইডেনের প্রধানমন্ত্রী স্টিফেন লোফভেনের দ্বিপাক্ষিক বৈঠক শেষে এক যৌথ বিবৃতিতে একথা বলা হয়।

প্রধানমন্ত্রী শেখ হাসিনা সুইডেনের প্রধানমন্ত্রী স্টিফেন লোফভেনের আমন্ত্রণে তিন দিনের দ্বিপাক্ষিক সফরে গত বুধবার সুইডেন পৌঁছেন। বাংলাদেশ ও সুইডেনের মধ্যে কূটনৈতিক সম্পর্ক প্রতিষ্ঠার ৪৫ বছরের ইতিহাসে এই প্রথম বাংলাদেশের কোনো সরকার প্রধান স্টকহোম সফর করছেন। যৌথ বিবৃতিতে বলা হয়, দুই প্রধানমন্ত্রী উভয় দেশের সম্পর্ক উচ্চতর পর্যায়ে নিয়ে যেতে একসঙ্গে কাজ করতে সম্মত হয়েছেন। তারা গত বছরের সেপ্টেম্বরে বাংলাদেশের পররাষ্ট্রমন্ত্রীর সুইডেন সফরকালে দুই দেশের পররাষ্ট্রমন্ত্রীর মধ্যে এমওইউ স্বাক্ষরে সন্তোষ প্রকাশ করেন। উভয় প্রধানমন্ত্রী উৎপাদনশীলতা ও প্রবৃদ্ধি অর্জনে বৈশ্বিক চুক্তির অবকাঠামোর আওতায় সহযোগিতা করতে অঙ্গীকার করেন। বাংলাদেশের নাগরিকদের প্রশিক্ষণ ও বৃত্তি প্রদানে সুইডেন সরকারের চলমান কর্মসূচির প্রতি স্বাগত জানিয়েছে ঢাকা। উভয় দেশের মধ্যে সহযোগিতার আরো ক্ষেত্র উন্মোচনে বাংলাদেশে ও সুইডেন সরকার শিক্ষা ও গবেষণায় উৎসাহ প্রদানে একমত হয়েছে। দুই প্রধানমন্ত্রী এসডিজিসহ '২০৩০ এজেন্ডা ফর সাসটেইনেবল ডেভেলপমেন্ট' বাস্তবায়নে দৃঢ় অঙ্গীকার ব্যক্ত করেন।

সুইডেনের প্রধানমন্ত্রী স্টিফেন লোফভেনের কার্যালয়ে এই দ্বিপাক্ষিক বৈঠক শেষে পররাষ্ট্র সচিব মো. শহীদুল হক এবং প্রধানমন্ত্রীর প্রেস সচিব ইহসানুল করিম ব্রিফ করেন। পররাষ্ট্র সচিব বলেন, বাংলাদেশ এবং সুইডেন সন্ত্রাসের বিরুদ্ধে লড়াই এবং সহযোগিতার নতুন ক্ষেত্র হিসেবে জ্বালানি নিরাপত্তা, প্রযুক্তিগত উদ্ভাবন, ব্যবসা এবং নগর উন্নয়নে একযোগে কাজ করতে অঙ্গীকারাবদ্ধ হয়েছে।

স্টিফেন লোফভেনের সঙ্গে দ্বিপাক্ষিক বৈঠক ছাড়াও গতকাল সুইডিশ রয়্যাল ক্যাসলে সুইডেনের রাজা ষোড়শ কার্লের সঙ্গে সাক্ষাৎ করেন প্রধানমন্ত্রী শেখ হাসিনা। তিনি সুইডেনের পার্লামেন্ট পরিদর্শন করেন এবং ভারপ্রাপ্ত স্পিকার তোবিয়াস বিলসট্রোমের সঙ্গে বৈঠকে মিলিত হন। এছাড়া সুইডেনের উপ-প্রধানমন্ত্রী ইসাবেল্লা লাভিন এবং বিচার ও অভিবাসনমন্ত্রী মরগান জোহানসন প্রধানমন্ত্রী শেখ হাসিনার সঙ্গে সাক্ষাৎ করেন। সূত্র-ইত্তেফাক (পৃ.১,ক.৮), জনকণ্ঠ (পৃ.১,ক.৭), অবজারভার (পৃ. ক. ৬), এশিয়ান এজ (শেষ.পৃ.ক.৮)। জনকণ্ঠ, সমকাল, ইত্তেফাক, এশিয়ান এজ, ডেইলি স্টার, ইন্ডিপেনডেন্টসহ অধিকাংশ পত্রিকা এ বিষয়ে ছবিসহ খবর ছেপেছে।

২। সুইডেনের রাজার সঙ্গে প্রধানমন্ত্রী শেখ হাসিনার সাক্ষাৎ

সুইডেনের রাজা ষোড়শ কার্ল বাংলাদেশের উন্নয়নের প্রচেষ্টার সঙ্গে কাজ করতে তাঁর দেশের আগ্রহের কথা প্রকাশ করেছেন। প্রধানমন্ত্রী শেখ হাসিনা গতকাল তাঁর সঙ্গে দেখা করতে গেলে তিনি এ কথা বলেন। সুইডেনের রাজার উদ্বৃতি দিয়ে পররাষ্ট্র সচিব শহীদুল হক বলেন, 'সুইডেন শুধু বাংলাদেশে বিনিয়োগ নয়, বাংলাদেশের উন্নয়নের প্রচেষ্টায়ও অংশ নিতে আগ্রহী।' বৈঠক শেষে তিনি বলেন, সুইডেনের রাজা প্রধানমন্ত্রী শেখ হাসিনার নেতৃত্বে বাংলাদেশের আর্থসামাজিক উন্নয়নের উচ্ছ্বসিত প্রশংসা করেন। তিনি বলেন, রাজা এবং প্রধানমন্ত্রী দারিদ্র্য বিমোচন, নারীর ক্ষমতায়ন এবং শিশু মৃত্যুহার হ্রাসে বাংলাদেশ যে রোল মডেলে পরিণত হয়েছে তা নিয়ে আলোচনা করেন। সূত্র-সমকাল (পৃ.১৫, ক.২), সংবাদ (শেষ পৃ., ক.৪), এশিয়ান এজ (শেষ পৃ.,ক.৪)।

৩। সুইডেনের স্টকহোমে বাংলাদেশের প্রধানমন্ত্রীকে লাল গালিচা সংবর্ধনা

প্রধানমন্ত্রী শেখ হাসিনা সুইডিশ প্রধানমন্ত্রী স্টিফেন লোফভেনের আমন্ত্রণে তিন দিনের দ্বিপাক্ষিক সফরে গত বুধবার রাতে সুইডেন পৌঁছলে তাঁকে লাল গালিচা সংবর্ধনা দেয়া হয়। স্ক্যান্ডিনেভিয়ান এয়ার লাইন্সের একটি বিমান প্রধানমন্ত্রী ও তাঁর সফরসঙ্গীদের নিয়ে স্থানীয় সময় রাত ৯টা ৪০ মিনিটে সুইডিশ রাজধানীর আরলাভা বিমানবন্দরে

অবতরণ করে। পরে সুইডিশ সশস্ত্র বাহিনী প্রধানমন্ত্রীকে গার্ড অব অনার প্রদান করে। স্টকহোমের আরলাভা বিমানবন্দর থেকে প্রধানমন্ত্রীকে মোটর শোভাযাত্রা সহকারে গ্রান্ড হোটেলে নিয়ে যাওয়া হয়। সুইডেন সফরকালে তিনি সেখানেই অবস্থান করবেন। শেখ হাসিনা হোটেলে পৌঁছলে সেখানে অল-ইউরোপিয়ান আওয়ামী লীগ নেতারা তাঁকে স্বাগত জানান। সূত্র-ইত্তেফাক (পৃ.১৯,ক.৩), নিউজ টুডে (পৃ.১,ক.৮), ইন্ডিপেন্ডেন্ট (পৃ.১,ক.৮), বাংলাদেশ টুডে (শেষ পৃ,ক.২)। ইনকিলাব, নিউজ টুডেসহ অধিকাংশ পত্রিকা এ বিষয়ে ছবিসহ খবর ছেপেছে।

৪। পাহাড় ধসে প্রাণহানি ও ক্ষয়ক্ষতিতে ত্রাণ, পুনর্বাসন ও সংস্কার কার্যক্রম পরিচালনার নির্দেশ প্রধানমন্ত্রীর

পাহাড় ধসে প্রাণহানি ও ক্ষয়ক্ষতির ঘটনায় সেনাবাহিনীর সহায়তায় অবিলম্বে ত্রাণ, পুনর্বাসন ও সংস্কার কার্যক্রম পরিচালনার নির্দেশ দিয়েছেন প্রধানমন্ত্রী শেখ হাসিনা। মুখ্যসচিব কামাল আব্দুল নাসের চৌধুরী গত বৃহস্পতিবার সংশ্লিষ্ট দফতরগুলোতে পাঠানো এক আদেশে এ তথ্য জানান। ত্রাণ বিতরণের পাশাপাশি ভূমিধসে ক্ষতিগ্রস্ত রাস্তাঘাট ও অবকাঠামো সংস্কারসহ ১৯টি বিষয়ে নির্দেশনা দিয়েছেন সরকারপ্রধান। সূত্র-সংবাদ (পৃ.১,ক.৫)।

৫। বাংলাদেশের শ্রমমান ও শ্রম অধিকার নিয়ে আইএলওর বিশেষ অনুচ্ছেদ প্রত্যাহার

বাংলাদেশের শ্রমমান ও শ্রম অধিকার নিয়ে বিশেষ অনুচ্ছেদটি প্রত্যাহার করে নিয়েছে আন্তর্জাতিক শ্রম সংস্থা (আইএলও)। শ্রম অধিকারের বিশেষ অনুচ্ছেদটিতে দেওয়া সুপারিশগুলোর অনেক ক্ষেত্রে 'প্রশিধানযোগ্য অগ্রগতি' হওয়ায় গতকাল জেনেভায় আইএলওর ১০৬তম সম্মেলনে তা প্রত্যাহার করা হয়। সুইজারল্যান্ডের রাজধানী জেনেভায় আন্তর্জাতিক শ্রম সম্মেলনে (আইএলসি) ১৩ জুনের এক কর্ম-অধিবেশনে বাংলাদেশ সম্পর্কিত বিশেষ অনুচ্ছেদ নিয়ে বাংলাদেশের অবস্থান তুলে ধরেন আইনমন্ত্রী আনিসুল হক। আন্তর্জাতিক মানদণ্ডে ঘাটতি থাকায় বাংলাদেশের শ্রমমান নিয়ে গত আইএলসিতে বিশেষ অনুচ্ছেদটি যুক্ত করা হয়েছিল। সূত্র-প্রথম আলো (পৃ.২,ক.২), সমকাল (শেষ পৃ, ক. ৫)।

৬। গম ও ভুট্টার উৎপাদন বাড়াতে ইনস্টিটিউট হচ্ছে : সংসদে বিল উত্থাপন

দেশে গম ও ভুট্টার উৎপাদন বৃদ্ধি এবং এ বিষয়ে গবেষণার জন্য ইনস্টিটিউট প্রতিষ্ঠায় একটি বিল উত্থাপন করা হয়েছে। গতকাল জাতীয় সংসদের বৈঠকে 'বাংলাদেশ গম ও ভুট্টা গবেষণা ইনস্টিটিউট বিল-২০১৭' উত্থাপন করেন কৃষিমন্ত্রী মতিয়া চৌধুরী। সূত্র-সমকাল (পৃ.১৯,ক.৫), প্রথম আলো (পৃ.২,ক.৫), এশিয়ান এজ (পৃ. ১২,ক.৫), ডেইলি স্টার (পৃ.৪,ক.৮)।

৭। বঙ্গবন্ধুর খুনিদের সম্পত্তি জব্দে ব্যবস্থা নেওয়া হয়েছে : সংসদে স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, জাতির পিতা বঙ্গবন্ধু শেখ মুজিবুর রহমান হত্যা মামলায় দণ্ড পাওয়া খুনিদের স্থাবর সম্পত্তি ও ব্যাংক হিসাব জব্দে প্রয়োজনীয় ব্যবস্থা নেওয়া হয়েছে। গতকাল সংসদ অধিবেশনের প্রশ্নোত্তর পর্বে স্বরাষ্ট্রমন্ত্রী এ কথা বলেন। পলাতক খুনিদের দেশে ফিরিয়ে আনার উদ্যোগ বিষয়ে এক প্রশ্নের জবাবে স্বরাষ্ট্রমন্ত্রী জানান, যুক্তরাষ্ট্র ও কানাডায় পলাতক খুনিদের দেশে ফিরিয়ে আনার আইনি প্রক্রিয়ার অংশ হিসেবে দুই দেশের ল' ফার্ম নিয়োগ করা হয়েছে। এছাড়া ইন্টারপোলের মাধ্যমে বিশ্বের গুরুত্বপূর্ণ আন্তর্জাতিক বিমানবন্দরে সাজাপ্রাপ্ত খুনিদের ছবি সম্বলিত তথ্য পাঠানো হয়েছে, যাতে খুনিদের অবস্থান চিহ্নিত করতে প্রয়োজনীয় ব্যবস্থা নেওয়া হয়। সূত্র-ইনকিলাব (পৃ.১, ক.৪), সমকাল (পৃ.১৯, ক.১), নিউজ টুডে (পৃ.৩, ক.১), অবজারভার (পৃ.১, ক.৮)।

৮। ঈদে যাতায়াতে পুরাতন গাড়ি নামানো যাবে না : ডিএমপি কমিশনার

আসন্ন রমজানে ঈদে ঘরমুখী মানুষের যাতায়াত আরামদায়ক ও নির্বাঞ্ছিত করতে রাস্তায় পুরাতন লক্কড়-বাক্কড় গাড়ি না নামাতে আহ্বান জানিয়েছেন ডিএমপি কমিশনার। রাজধানীর গাবতলী বাস টার্মিনালে গতকাল ঢাকা মেট্রোপলিটন পুলিশের ট্রাফিক পশ্চিম বিভাগের আয়োজনে আইনশৃঙ্খলা ও ট্রাফিক ব্যবস্থাপনা সংক্রান্ত মতবিনিময় সভায় গাড়ির মালিকদের উদ্দেশে এ কথা বলেন ডিএমপি কমিশনার মো. আছাদুজ্জামান মিয়া। সূত্র-সংবাদ (পৃ.১,ক.৫), ইনকিলাব (পৃ.২,ক.১), এশিয়ান এজ (পৃ.৩,ক.৪)।

৯। ঈদকে ঘিরে দেশে নিরাপত্তার কোনো ঝুঁকি নেই : র্যাব মহাপরিচালক

র্যাবের মহাপরিচালক বেনজীর আহমেদ বলেছেন, ঈদকে ঘিরে দেশে নিরাপত্তার কোনো ঝুঁকি নেই। তারপরেও ঈদকে ঘিরে সারাদেশে নিরাপত্তা জোরদার করা হয়েছে। ঈদুল ফিতর শান্তিপূর্ণভাবে উদ্‌যাপনের জন্য জনগণের জানমালের নিরাপত্তায় মাঠে রয়েছে র্যাব। গতকাল ঈদের নিরাপত্তায় কমলাপুর রেলওয়ে স্টেশনের সার্বিক পরিস্থিতি পরিদর্শন শেষে তিনি এসব কথা বলেন। সূত্র-ইনকিলাব (পৃ.১,ক.১), যুগান্তর (পৃ.৩,ক.৪), নিউ নেশন (শেষ পৃ.,ক.৭), নিউ এজ (পৃ.৩,ক.৫)।

১০। রাজধানীতে তিন দিনের জাতীয় ফল প্রদর্শনী আজ শুরু

ফলদ বৃক্ষ রোপণ পক্ষ ও তিন দিনব্যাপী জাতীয় ফল প্রদর্শনী আজ শুরু হচ্ছে। এবারের প্রতিপাদ্য 'স্বাস্থ্য পুষ্টি অর্থ চাই, দেশি ফলের গাছ লাগাই।' রাজধানীর ফার্মগেটে আ কা মু গিয়াসউদ্দীন মিল্কী অডিটরিয়াম চত্বরে আজ ১৬ জুন হতে ১৮ জুন জাতীয় ফল প্রদর্শনী অনুষ্ঠিত হবে। ফলদ বৃক্ষ রোপণ পক্ষ চলবে ৩০ জুন পর্যন্ত। সচিবালয়ে গতকাল তথ্য অধিদফতরের সম্মেলন কক্ষে ফলদ বৃক্ষ রোপণ পক্ষ ও জাতীয় ফল প্রদর্শনী নিয়ে সংবাদ সম্মেলনে কৃষি মন্ত্রণালয়ের অতিরিক্ত সচিব মোশারফ হোসেন এ তথ্য জানান। এ সময় প্রধান তথ্য কর্মকর্তা কামরুন নাহার উপস্থিত ছিলেন। সূত্র-যুগান্তর (পৃ.২১,ক.৬), সংবাদ (পৃ.৪,ক.৫)।

সম্পাদকীয়

- ক. **ইত্তেফাক** : রাজধানীর অনেক বাজারেই সিটি করপোরেশনের নির্ধারিত মূল্যতালিকা মানা হচ্ছে না উল্লেখ করে এ ব্যাপারে সংশ্লিষ্ট কর্তৃপক্ষকে নিয়মিত মনিটরিং এর সুপারিশ।
- খ. **সংবাদ, ভোরের কাগজ** : ঈদে ঘরে ফেরা মানুষের দুর্ভোগ লাঘবে নৌপথে ও সড়কপথে দুর্ঘটনামুক্ত ও যানজটবিহীন নিরাপদ যাত্রা নিশ্চিত করার আহ্বান।
- গ. **প্রথম আলো** : রাস্তা খোঁড়াখুঁড়ির সঙ্গে জলাবদ্ধতা যোগ হয়ে ঢাকার জনজীবন দুর্বিসহ হয়ে পড়ায় উদ্বেগ প্রকাশ করে জলাবদ্ধতা মোকাবিলার জন্য জবরদখল হয়ে যাওয়া খাল ও অন্যান্য প্রাকৃতিক জলাশয় পুনরুদ্ধারের ওপর গুরুত্বারোপ।
- ঘ. **ডেইলি স্টার** : রাজধানীতে যত্রতত্র বাসে যাত্রী ওঠানামার কারণে প্রায়ই দুর্ঘটনা ঘটে উল্লেখ করে এ অবস্থা নিরসনে নির্দিষ্ট জায়গায় বাসস্টপ করার সুপারিশ।
- ঙ. **ইন্ডিপেনডেন্ট** : সম্ভাবনাময় পর্যটন শিল্পের বিকাশে যথাযথ পদক্ষেপ কামনা করে সম্পাদকীয় প্রকাশ করেছে।

#